

# Armachanus Redivivus

VEL,

In *Aprilis* 17<sup>mo</sup> diem nuperi Funeris Domini Virique  
verè reverendi, pientissimi, nec non eruditissimi

## JACOBI USSERII

Totius *HIBERNIÆ* PRIMATIS, &c.


## ORATIO ANNIVERSARIA

Habita nuper ad Academ. celeberrimam *Oxoniæ*,

Illustrissimoque Domino *Richardo* ejusdem Can-  
cellario, & Domino *Henrico* Cancellario *Dublino*

Seorsim dedicata.

à *Fitzpaynæo* Piscatore.



LONDINI,  
Typis *Gulielmi Godbid*, Salutis ærâ  
M. DC. LVIII.



HEROI

Verè Illustrissimo, Fortissimo, Humanissimo;  
Maximóque suæ vetustissimæ Familiæ  
Ornamento :

Seculi sui, *BRITANNIARUM*que PRINCIPI  
Defideratissimo,

DOMINO

RICHARDO

Serenissimi nostri *PRINCIPIS*

OLIVARI

FILIO & HÆREDI

AMPLISSIMO;

Ad CONCILIUM Magnum

Cooptato ;

Nec non ACADEMIÆ celeberrimæ *OXONIÆ*


Quam dignissimo

CANCELLARIO.

*P. P.* Hanc ORATIONEM dicat devovétque

nec non animitus apprecatur

Fælicitatem, Victórias, Triumphos, &c.






# ARMACHANUS

REDIVIVUS.

*Reverendi Seniores, Honorandi Patres; eruditi Juvenes,  
& Pupilli: Et vos omnes cujuscunque gradus Acade-  
mici, quotquot huc confluxistis,*

SALVETE.

 Ecundus nunc agitur annus ex quo celeberrimus Hiberniarum *Primas* vivis excessit. Secundus nunc annus agitur, & utinam novissimus non fuisset apud vos *Annus Intercalaris* Qui nupero silentio memoriam tanti Viri *Translucistis*. Sed Silentii Causam facile est conijcere, quum putandum sit, suspiria, gemitusque vestros adeo præcordiorum portas obvallasse, acsi cunctos aditus ad vocem præclusissent. Constabat vos lachrymis fuisse Liquidos, alioquin non credidissem Mutos. Non mirabor si vox sua faucibus hæserit *Oxonie*, quia consternata stupuit, adeoque saxea dirigit, ut non veriùs *Bos* in *Vado*, quàm *Bos* in lingua totius steterit *Academiae*. Sapienter igitur amici silebatis, quia tunc non eloqui potuistis. Leves quidem curæ loquaces fluitant, sed graviores in fundo subsidunt; Et ipsa Funalia pingui quo pascuntur fomite, eodem suffocata restinguntur.

Nec

Nec Infandus hic Interitus hæc tantummodo percussit Academiæ, sed & exteræ, quibus etiam gemitus extorsit, & horrores inculcavit. Ad *Antistitis* tanti Dissolutionem tanquam terræ motu concussus *Europæus* Orbis impalluit, quasi Suam prævidisset. Seminecem nostram *Britanniam* nutabundam vidimus, & has Oceani circumfluentes Insulas veluti novo lachrymarum Freto fluctuantes. Annus ille nimis eheu nobis Climactericus, qui tot literarum Fata portendebat. Dies ille nimis eheu luctuosus, & illo notabili Die *Lunæ* nigrior qui *Solem* sustulit *ARMACHANUM*. Sic in unius occasu caligamus omnes, & tenebris plusquam *Cimmeriis* obumbrati propalamur.

Non opus est igitur jam *Prologo*, quum dicendum sit de *Epilogo*. Marcescant *Laurus*, *Cupressus* petimus; absit *Eloquentia*, nescit *Dolor* esse *Disertus*. Non nostri est calami stratis phrasiuncularum præludere cincinnis, sed funebres *Taxorum* præferre *Tædas*, & votivis singultuum victimis venerandis Manibus parentare. Quæram de vobis quæ sit vestri mæroris facies? agnosco planè funestam. Quæritis de me quis nostri doloris color? En! Atramento depinximus, ut *Guttulas* quas *Oculi* negaverint, flentis, & fluentis calami stillicidiis exprimerentur.

Ingens habetis *Argumentum*, sed *Oratorem* minùs forsan eruditum. Ad hanc tamen *Provinciam* non invitatus accedo, quia non impulsus lugeo, ut eodem tempore nec malè de facundiâ nostrâ, nec benè de dolore judicare videamini. Quòd si *Theologus* ille non minùs scitè quàm sanctè dixerit, *Luctus non tam Mortuorum subsidia quàm Viventium solatia*; Quis tunc ulterius annualia defuncto *Iusta* deferet *ARMACHANO*? In posterum quis abnuet *Ipsius* memoriam lachrymarum *Balsamo* delibutam, *Posteritati* perennare? Non vacat (*Auditores* eruditissimi) non vacat cogitare quantum terreni nos amisimus, quum cogitemus quantum *Constellatus* Ille

Ille consequutus sit. Et tamen infælices sumus. Eodem nimirum die Literarum Respublica suo Patrono, Britanniarum, suo Genio, Ecclesiarum suo Palinuro derelictæ, destitutæ. Delicatus eorum dolor qui forsân Patrem, Fratrem, vel Amicum deploraverint; Angustæ nimis nœniæ quæ privati pectoris interclusæ parietibus vix oculorum ripas excessere. Nos in *ARMACHANO* hæc nostro perdimus omnia, & quod plus est, omnes; neque tantum luctum testari possumus singuli, quantum debemus Universi. Animadvertite vos igitur, Auditores, & colligite Jactura quàm Generalis vobis accreverit. Quodd si quis Generalem minus intellexerit, ad Particularia properè descendam, & exhibebo, vobis *ARMACHANUM*, in *PUERITIA* plusquam *SENE*. In *VITA* plusquam *HOMINEM*; In *MORTE* plusquam *MORTALEM*.

Patria est ubicunque benè est; nec certè malè fuit cum *Hiberniâ* quamdiù benè fuerat cum *ARMACHANO*. Hanc habuit pro Patriâ Terram, Cui nato *Dublinum* maternas mammas admovebat. O ferax Tellus, O feracior Urbs, quæ vel in hoc uno Partu novum Mundum peperisti, veteremque repârasti! Jactitet *Arpinum* se *Marium* Summum Imperatorem, & itidem *Marcum Tullium* summum Oratorem genuisse; Justius potest *Dublinum* vel in uno Christianissimo *ARMACHANO* quàm in mille *Mariis* aut mille *Marcis* gloriari.

Nec hæc fortunata Natalium sedes sine præfagientis *Numinis* agnitione revolvenda est. *Dubligenam* vel Indigenam *Dublino* diximus: Et obsecro vos unde aliàs nasceretur Ille nisi in Primâ & in Urbe metropolitana Qui ad *Metropolitani*, *Primatisque* Dignitates dudum Destinatus? In *Romano* Capitolio fundando Caput miræ magnitudinis effossum est, quum per hoc, inquit *Florus*, volebant *Romam* futuram totius orbis Caput augurari. Sed in Collegio *Dubliensi* Componendo Caput aliud admiremini: aliud inquam, adeoque *Romæ* Capitale, ut  
*ARMA.*



*ARMACHANUS* unus de pluribus Erroribus quàm tota Roma de subactis Gentibus, jure triumpharet. Et certè si victorias à Tropheis numeremus, plura jam chartacea in ipsius nupero musæo, quàm olim sericata in tot Imperatorum Scriniis ostenderentur.

Et quas non Ille fruges sibi potuit de tali Progenitorum stirpe polliceri? Optimis prognatus Parentibus, filius non potuit esse non optimus. Fælix *Henricus* Archiepiscopus de tali Nepotulo: Fælix Insignis Pater de tali Puerulo prædicandus. Alterius, Dotes & Honores succedaneus induebat; Alterius mores, Geniumque tam bellè repræsentabat, ac si mortuorum parentum virtutes in superstite Prole revixissent.

Vix Crepundia primæ deposuerat ætatulæ, Scholamque superaverat, quum Victor impubes ad *Dubliensem* contendebat Academiam. In Illo literarum *Libano* apud eminentiores *Cedros* merus furculus subrepfit: Surculus inquam, sed admodum festinus. Merus puer admissus est inter Patres, quia tanquam Pater audiit inter pueros. Antiquos enim Priscosque mores adeo tyrunculus expressit, ut quot passibus Seniores suos sequutus sit, tot parasangis Coætaneos omnes antecesserit.

Publicas intrabat Scholas vti Pugil in Palæstras, onn ut eminus excitaret artes, sed ut cominus in monomachiam Duellumque provocaret. In omnibus penè disputationum Velitationibus antesignanus extitit, quia Dux & Prodromus ubique præivit. Scientiarum Viridaria non modò perambulavit, sed citissimè percurrit; ut in literis quot Progressus, tot etiam Cursus fecisse crederetur. Sic didicit omnes ut easdem doceret, sic docuit, ut neminem quidem puderet ab Illo didicisse. A Lætionibus quotidianis, ex Equo tanquam *Trojano* privati Pupilli prodibant indies, & ita quidem prodibant, ut possent in posterum publico prodesse; non fieri sanè poterat quinde de tanto Sole, clarissima Sydera suborirentur. Tanta fuit concitatae mentis industria, tantus inflammati



flammati Pectoris fervor; tot denique perillustres dotes ad unum veluti Centrum conglobatæ, ut quicquid in cæteris desideraretur, in Illo plusquam redundaret.

Grandescentem quotidie Gigantæ famam Doctrinæ stupuerunt omnes, nec nunc ut de puero, sed ut de quodam Prodigio loquebantur. Alii non intellectum Scientiarum Profundum; Alii Perpetuum Litterarum Dictatorem; Alii selectissimum Theologiæ Sacrarum non veriti vocitare. Mirandis his enim dotibus mirandæ memoriæ felicitas accessit, de quâ tanquam de *Seneschallo* quicquid heri colligerat, hodiè severius exigebat. Nil erat in Theologicis, nil in Chronicis eminenter animadversum, nil in Philosophia concinnè dictum; Nil in Historiâ præclare gestum, Cujus non accuratè recordatus sit. Ita diligens erat in arcanis indagandis, ita promptus in explicando indagata, ut quicquid extitisset non magis evoluisse videretur quàm circumferre. Quod in Illo Natura formatrix inchoaverat, cultrix Disciplina perfecit: nullam tamen habuit Schedam seipso cultiorem, nec quidquam Scribere malebat, quam Scivisse. Qua ratione id assequutus est, ut ubicunque fuerat locorum non modo Bibliothecam secum portasse crederetur, sed esse; nec tantum plurima Legisse, sed penè nihil Ignorasse.

Et sic (Auditores ornatissimi) depinxi vobis *ARMACHANUM* in *PUERITIA* plusquam *SENEM*: & nunc fuisse in *VITA* plusquam *MORTALEM*, luculenter exhibebo.

Quod si sit homo repetendus ab humo, Constat Herorem nostrum nil hoc elemento minùs affectasse, nil magis omnino contempsisse. Hinc fuit ut vix in artibus Magister renunciaretur, quàm sibi renunciaverat *ARMACHANUS*. Induebat Togam, ut exueret Mundum: Rejecit igitur, & abdicavit Paternas Hæreditates, & Consanguineis suis sponte remisit, erogavit. Attendite nobilissimi Juvenes, & docemini. *Pyramidem* sempiternæ famæ structurus erat, idcirco *Stramen* & *Lateres* non admisit.

misit, Relictam noluit ab aliis Fortunam, qui faber futurus erat suæ. Mundanis noluit adminiculis sufflaminari Qui cæli firmiori fulcro innitebatur. Solutus est igitur ab humanioribus studiis ut accinctior Divina sectaretur. Alias quidem Scientias prout Sorores, alias prout ancillas, unam verò *Theologiam* ceu Dominam veneratus est. Veneratus est ut Dominam quia ducturus erat in uxorem. Nec hanc Reginam *Theologiam* Indotatam duxit, de Quâ, tantas Dotes reportabat quantas Dignitates. Accreverunt Honores indies, *ARMACHANUM* vel obruituri, & obruissent certè nisi meritis prævenisset. Ad Illos invitus ibat, ergo ferebatur. Nam pro certo est Illum non Dignitates, sed Dignitates Illum procaces ambiisse, sollicitasse: Contempsit enim quia merebatur, & magis inde merebatur, quia Contempsit.

A Cancellario *Divi-Patricii* ad Episcopatum *Medensem* citatus est; ab Episcopatu *Medensi*, Supremam *Primatis* Sedem passis velis advolavit. Quid enim diutius hæreret in Cerâ *Cancellariatus* Qui ad Episcopatum *Medii* designabatur? Quid tunc in *Medio* moraretur Qui fuit in *Summo* collocandus?

*Summus* erat, nemo tamen humilior; *Primas* audiit, nemo tamen suis despectior oculis, aut in aliorum visus eminentior. Non in Illo mores mutarunt Magistratus: Idem fuit Archiepiscopus, ac olim privatus; & quisquis nuper *Vsserii* nominis oblitus esset, in *ARMACHANI* meminisset. Ita mansuetus erat, Quo nil possit excogitari mitius; Ita comes, ut nullius supplicationem rejiceret; Ita affabilis, ut fere nemo fuerat quem non visu, voceque dignaretur. Omnibus eminens extendebat Humanitatem, Societatem verò suis. Portas aperuit Peregrinis; Arcas Exulibus; manum Pauperibus; sed ipsum Pectus scientiarum Candidatis. Ex his, alios promissis allexit; alios secum diutissimè detinuit; alios mox abituros munificè dimisit. Hinc è longinquo multi venerunt *ARMACHANUM*

**CHANUM** videndi studio conflagrantes. Os illud venerandum tandem volebant intueri, cujus famam toties admirati. Nil illa victrix *Amazonum* Regina se vidisse proclamabat nisi victorem vidisset *Alexandrum*; sic ex *Reformatis* Primiores, parum se literis profecisse putabant, si *Primatem* prorsus ignorarent. Qui novit, requirebat, & quum noscendo penitus obstupuisset, obstupendo redamabat.

Testes tot virorum Primipilariū litteræ dicam, vel Elogia? suffragia dicam, vel Tubas & Tympana, quæ vocale *Primatis* nomen per orbem totum cecinerunt, e-buccinârunt? Testes etiam tot libri clientelæ, Patrociniūque nominis *ARMACHANI* tanquam Delubro consecrati. Testes denique tot, Manuscripta dicam vel monumenta? quæ maximis suis sumptibus remotissimis terrarum angulis eruebat. Illa tot inquam vetusta Membranarum monumenta, in tantos congesta cumulos, ut non modò nostrum *Bodleianum*, sed illud etiam *Romæ Vaticanum* *Primatis* Bibliothecæ crederentur æmulari. Non est (Auditores eruditissimi) non nostri est adulari, sed *ARMACHANI* mortui virtutes vivâ voce commemorare: Et certè sigillatim commemorarem, singulasque percurrerem, nisi Laconicâ perstricturus brevitate magnitudini derogarem. Sic illi curiosiores Cosmographi, qui dum universum mundum veluti intra annuli circumlūm complecti moliantur, injuriosè nimis operæ pretio detrahunt & dignitati. Hanc ego laudandi Provinciā pro capto meo susciperem, sed si pro mole meritorum *Primatis* conarer, in labyrinthum totus devolverer, & per inextricabiles illas ambages facilius foret finem quàm principium invenire.

Quis enim satis Illum prædicabit, cujus vita perpetua fuit Prædicatio? Qui vixit ad eandem quam dixit, & præscripsit Normam, pulcherrimèque Theoriam per Praxin illustravit. Nam, quoties Ille sanctus secessit, & secum cogitabundus deliberârat, toties nobis ex tempore concio-

B

natus est:



natus est: & si vel horariae contemplationes Lucem viderent, in Hebdomadales migrassent Homilias, & plusquam seculo suffecissent.

In vultu gravitas; In voce Tonitru; in vita Fulgur elucebat. Illa fuit in Scriptis compellatrix calami blandientis authoritas; Illa fuit in Rostris fulminatrix Facundiae Suada, ut sive stylo transfoderet Hæresiarchas, imitatus *Tullium*; sive de suggesto doceret Reformatos, personaret *Paulum*. In ambobus adeo præcelluit unus *ARMACHANUS*, ut ambigendum sit an plures morti scribendo subtraxisset, an ad vitam prædicando revocasset.

Novit in Ecclesiis ædificandis quàm plurimùm vitæ claritas contulerit, & Eloquentiam fore meram Calcem sine Arenâ, nisi, Pietatis Cæmento consolidetur. Ad hæc, perspectæ viros integritatis ad Ecclesiasticos honores invitavit, evexit. Nil apud Illum Simoniacum, nil apud Illum Venale; nullus extra Gratiam locus; nullæ citra meritum dignitates. Hinc pientissimus Ille paterfamilias ad Disciplinam redegit totam Diocesin ac si Domicilium; & tot passim dispersæ *Utoniæ* Parochiæ, quasi una Schola, sub uno Magistro visæ convenisse. Ecclesiarum stipendia promovebat, & enucleatas omnes circa Religionem difficultates enodabat. Cleri privilegia tuebatur, nec imminui passus est; & si quid in Diocesi litigiosæ prævaricationis oriretur, illicò consilio sedavit, autoritate suppressit. Tantæ fuit existimationis apud alios, tantæ venerationis apud Suos, ut Quem timerent ut Archiepiscopum, amarent ut Patrem, & quoddam amabant ut Patrem parebant ut Antistiti.

Nec semper intra patriæ limites vel musæi parietes sedentarius torpere voluit. Ad id, libros diu legerat, ut homines tandem doctior intelligeret. Domi novit Hectores interdum nasci, sed Ulysses omnino foras proficisci. Publicis igitur ita poscentibus (in futurum patriæ suæ commodum)

libris



libris emendis, & litteris redemendis Angliam nonnunquam transfretavit. Regiis illinc rebus urgentibus, Aulicus illuxit, & quod rarum est, Aulicus sine fastu; Senator sine furo; Paludatus sine Prætextu. Non fuit versipellis affectuum, vel Temporum Proteus, non subdolum aucups Ceremoniarum, quia non aliam linguam quam mentem, non alium vultum quam Pectus uspiam prætendebat. In Regni seris, dubiisque deliberandis, erant cogitationes plenæ consilii; Dieta plena sapientiæ; Exempla plena authoritatis.

Nec hæc officia publica seclusæ munia Pietatis interpellarunt, aut à studiis animum divinis avocabant, in quibus ad usque finem suavissimè feriatum est. In maximo negotio suo fruebatur otio, Regiæ dignitatis omnino memor, suæque semper oblitus. En Hominem perfectè Civilem! En Civilem consummatissimè Christianum! Vultis Fidem? nulli purior; vultis spem? nulli certior; vultis charitatem? nulli Diffusior. O mentem verè sublimem, & ad æternitatis Fontes anhelantem! sic enim Terris egit, ut semper Cælum suspiceret, & quoties ab hominibus secederet, cum DEO versaretur. Hinc fuit, ut apud Puriorum Temporum Professores zelosus, apud zelosos, sanctus, apud sanctos, Angelus emeretur: Angelus Pacis, nuntius Evangelicus, Fæderum Præco; In Terris Tuba; de cælo Fæcialis.

Et sic (Auditores humanissimi) demonstravi vobis ARMACHANUM fuisse in VITA plusquam HOMINEM: nunc pace vestrâ fuisse in MORTE plusquam Mortalem paucis exhibebo.

*Ante obitum nemo supremæque Funera felix.*

Ad hoc, Ennius ille doctissimus se mortuum Lachrymis decorari vetuit, & hanc causam superaddidit, quòd post mortem per ora virorum vivus

volitaret. *Marcus Varro*, Quo nemo plura commentatus est, ob Immortalitatis spem se tantos suscepisse labores significabat hoc Effato celeberrimo,

*Legendo & Scribendo vitam procudi.*

Quòd si Veteres suis *Philosophis* tantos attribuerint honores, quantos nos nostro conferemus *ARMACHANO*? Quo, non priorem, prisca videbat ætas, nec parem, forsitan postera visura est. *ARMACHANUS* Ille, nuperi seculi Delicium, nostrique jamjam viduati dolor cheu, longæque Desiderium. Ille est, Auditores, qui fuit optimus *Præsul* apud Summos, & Idem *Pastor* summus apud Infimos: immo Qui sic utrumque conjunxit, ut nomine tantummodo non officio discriminarentur. Optimus Ille nimirum *Pastor* Qui pro suis ovibus, non opes modò sed & animam voluit oppignerare: Qui quicquid vixit Illis vixit, non sibi; tam mori paratus ut Illæ viverent, quàm vivere contentus ut non Illæ morerentur. Testis tota vita est, quum de Bonis quibus circumfluebat tantillum sibi præcerperit ad usum, sed ad voluptatem penè nihil. Qui quum Dominus esset multorum, se servum fecit omnium; satiusque duxit sibi subesse, quàm cæteris Imperare. Flebat cum flentibus, dolebat cum dolentibus, & infortunia Sociorum sympatheticus, inter sua numerabat. Ecquis ab Undis quid damni passus est? Illius charitas in flammam prorupit. Ecquis ab Igne quid dispendii passus est? Illius charitas in lachrymas resoluta est, ut Imbribus oculorum, populatrices flammam expiaret. Ille suas quàm bene cognovit Oves! Oves Illum quàm benè cognoverunt! Pauperes œconomum, Pupilli, Patrem, Schismatici vindicem, omnes misericordem. Novit quid ad gregis Morbum, novit quid foret ad medelam. Quantam adhibuit diligentiam Stantes corroborando! vacillantes erigendo! Palantes ad ovile revocando! Nec in his cura privata fuit, sed ubique distenta, perque omnes circumfusa. Non satis Illi fuit Reformatæ Fidei semina sub suo Pecto-

re nutrijſſe niſi ſparſerat in alieno : non ſatis Illi fuit Puritatis fovijſſe fibras, niſi & Hæreſeos evulſiſſet. Huc ſpectabant continuæ cogitationes, huc dies in orationibus, huc noctes in vigiliis exantlatæ.

Nec ad ultimum *Pæſtoris* munia deſtituit quum fuit in ultimo penè deſtitutus. Monitu proculdubio *Divino* tempeſtivus ab *Hibernia* reſceſſit, priuſquam funeſtæ calamitates erupijſſent, & Illi Lupi Bipedes, Belluæque deprædatrices diſperſas Oves horribili lanienâ jugulâſſent. Mutavit Patriam, mutavit mitram, mutavit Fortunas, animo nihilominus immotus, immutatus. In Roſtris apud *Hibernos* ephebus & crudus Concionator adolevit; In Roſtris apud *Anglos* Concionator valde ſenex perſeveravit. Apud Illos, a Prædicatore *Primatis* honores auſpicatus eſt; apud noſtros à Primate, in *Prædicatorem* remigrabat. Sic oportuit *Imperatorem* ſtantiem mori, ſic cadentem decuit *Archiepiſcopum* ſtetijſſe, & in ſacris expirâſſe. Nec certè poſtremò, quum vox & ſpiritus Illi defuerant, ſuis *animo* deeſſe voluit, nam quum non loqui potuerat quæ ſcripſit, ea tamen ad ultimum ſcripſit quæ nos in æternum loqueremur. Solis inſtar in occaſu glorioſior illuxit, & pallidum Mortis Crepuſculum, mirandis ejaculationum radiis inauravit.

Quòd ſi ſapienter Ille *Solon* dixerat, *Cuique finis expeſtandus eſt ut recte judicetur*, & poſt actam vitæ fabulam ſupremus concitetur Plauſus; quis tunc Palmam, quis adorem vincenti denegabit *ARMACHANO*, Qui mortalitatis Perſonam laudabiliter exuit, & vel in vitâ, de morte triumphavit? Sic enim vixit ut ſe quotidie moriturum meditaretur, & ſic moriebatur acſi perpetuo victurum ſeſe meminijſſet.

Si computemus *Ætatem*, conſtabit Illum tantummodo ſeptuaginta ſex annos compleſſe, ſed ſi virtutes numeremus, digniſſimum ſane judicabimus *Nefſtorea* ſecula ſuperâſſe. In his longævus vixit, In his longævus exceſſit. Vixit in operibus, ſuiſque vigebit operoſis Ille voluminibus,



bus *Mausoleo* plusquam marmore perennandus. Sed quod ad nos spectat misellos (magne Pater) miseri quidem sumus quod tibi sumus superstites; miseri quod non tecum migrare potuerimus; miseri quod sine te cogamur in terris desolati commorari. Dextrum, dextrum perdidimus oculum, & si laevus adhuc nobis relictus sit, ad incommodum forsitan relictus est, ut gravius inde videamus infortunium. O quam sub exiguo pulvere compressus Ingens jacet **ARMACHANUS!** O quam paucorum pedum circuitu cineres illius componuntur! Cujus famæ nimis angustum fuit *Europa* tota monumentum: Jacet illud stupendum nobis Ingenium: Admiranda jacet illa posteris Industria: Jacet illa tot Linguarum scientia, tot scientiarum memoria, dotesque tam sanè multiplices, ut quod quis spectet penitiùs, eò miretur magis; quod diutiùs, eò satietur minùs. Concessit Fato, vir Fati, mundique spretor; succubuit morti, Vir omnibus Virtutum numeris absolutissimus; non iterum visurus nos, non à nobis iterum videndus. Recoligite tamen Naufragii Tabulata; colligite Ruinas; contemmini reliquias & ad memoriam redivivas revocate. Contemmini venerandam capitis Canitiem supremam mundi messem maturitate præcurrentem; Contemmini Corpus illud in multos labores induratum, vigiliis attritum; Lucubrationibus exhaustum; contemmini pacificum vultum senii fulcis exaratum, in quo tanquam tot characteribus, seculi sui calamitates inscribebantur.

*O Beate vir*, qui vix citiùs Terris desieras, quàm Cæli Gaudia Prælibaveras! *O Beate vir*, Qui jam consequutus es quæ diutissimè sperabas, & quæ consequutus es nunquam perdes, nunquam depones. Mors Tibi non Tumulus, sed Torus; Spiritus tuus translatus est, non decessit; locum mutavit, non reliquit: miserrimi sunt qui cum morte luctantur, Tu mortem præstolando prævenisti, supplantasti; ut non minùs vivus ad mortem, quàm mortuus ad vitam viderere.

Vale



Vale grande scientiarum Propugnaculum, *Atlas* in-  
defesse laborum, maxima columna litterarum! *Uto-*  
*niensium* centesime vale Pater Antistitum! princeps Præ-  
sulum! mitrarum Gemma! Perduellium malleæ! Refor-  
matorum munimentum! Superest nobis (ut uno verbo  
singula complectar) superest, inquam, nobis orbitas eheu  
luctuosa; nobis, vobis, omnibus, ut quot nuper viros vidi-  
mus ad *ARMACHANI* Feretrum confluisse, tot eti-  
am Funera crederemus in unius Funere celebrari.

——— *Sed Cinthius aurem.*

Sat Lachrymis nostris, Sat laudibus litavimus  
*ARMACHANI*. In hoc vasto lachrymarum, laudum-  
que Pelago latiùs excurrerem, nisi vererer patientiæ vestræ  
jacturam fecisse: littus igitur petiturus, foliorum carbasa  
complicabo, vestrisque Favoniis adjutus, anchoræ certus,  
Portuque tutus

acquiescam.

---

FINIS.

---

Ex officinâ Typographicâ GULIEL. GODBID  
Maii 8<sup>to</sup>. M DC LVIII.